



黃梨

酸酸甜甜水分又多个黃梨，係盡多人好食个果子。黃梨係對中南美洲傳到中國，正又對中國傳來臺灣。俚等个農民實在還壁，研究出蓋多品種个黃梨，故所一年透天都食得著黃梨，毋過，還係清明過後到大暑時節出个最好食。

在學老話裡背，「王梨」同「旺來」會共音，係祝福運氣好、生理興旺。黃梨个皮同果肉都有黃金个色身，係表示富貴、黃金賺滿滿。特別係做生理个、開公司个，愛做牙、唱喺時節，就盡好準備黃梨來拜，望得大賺錢。

種黃梨愛在晒日頭、排水好个所在，故所在臺灣中南部个細粒山頭，就會看著滿山滿坪个黃梨。黃梨愛十八隻月正有好收成，雖然平常無麼需要照顧，毋過佢還係有愛注意著个地方哦！一開始愛先將泥翻鬆、耙田耙好來，用塑膠布仔畚等，做得保持泥肚个水分，又過毋會生草。續下來，就將苗仔一頭一頭種落一空空仔个塑膠布仔裡背。黃梨毋使忒輒淋水，種有一年地，就愛淋肥、催花。有打花地又愛過淋肥，等有打子愛同佢抵日頭，正毋會晒傷。差毋多三股一股个皮轉黃就熟地，就做得摘來食地啲！

臺灣个天時無係穩定，寒時盡寒，熱天熱到會癢，夏秋時又有風搓，發風落雨幾下日。好得黃梨最多三尺零，無麼高又無硬梗，毋驚風吹斷；果子又惹惹在頂項，毋驚會浸著水；愛食黃梨个蟲仔也都有農藥來預防地，算來，佢係過毋會受著災害影響个農產品。

黃梨个經濟價值盡大，佢个葉仔外背刺刺个皮擘核，裡背个絲絞(gauˋ)爛地可以做紙，拿來做藝術品盡鬧。果子个皮洗淨、等發酵，可以做酵素，拿來洗碗、搓鑊頭，盡清淨，又毋會汙染環境。黃梨心過粗過硬，有兜人毋好食，毋過晒燥來，切做細塊攪(giauˋ)糖，係細人仔盡愛个零嗒。在日本時代，臺灣个黃梨罐頭品質蓋好，大部分都做外銷。

去市場仔愛仰仔擇黃梨呢？杓該果肉，聽起來過沉聲，拿起來重鈦鈦仔、過重秤，鼻起來有香味，摸起來一目一目个皮過粗，看起來該皮有息把青、息把黃，就係好食个黃梨。食毋核个黃梨愛仰結煞？聰明精智个客人就用豆豉脯、鹽、糖來滷黃梨醬。滷醬菜个盎仔定著愛洗淨、覆燥來，黃梨醬正毋會有臭魷味。用黃梨醬、黃梨、苦瓜、雞脾來煮黃梨苦瓜雞仔湯，咁起來苦甘苦甘，係會分人思念个客家灶下个味緒。

你好食黃梨無？愛打淨食也係煮菜、煮湯？希望大家都來食這滿大出个黃梨。

作者：吳秀梅

☆詞彙學習☆

【壁】biagˋ：能力很好。

【色身】sedˋ siinˋ：顏色。

【唱喺】cong iaˋ：拜拜。

【三股一股】samˋ guˋ idˋ guˋ：三分之一。

【熱到會癢】ngiad do voi leuˋ：熱得要命。

【惹惹】ngia ngia：翹高高。

【鑊頭】vog teuˋ：鍋子。

【過重秤】go cungˋ ciinˋ：重量較重。

【大出】tai cudˋ：盛產。